

NO. SOALAN: 67

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : YB. TUAN WONG SZE PHIN @ JIMMY
[KOTA KINABALU]**

TARIKH : 6 MAC 2017

SOALAN :

YB. Tuan Wong Sze Phin @ Jimmy [Kota Kinabalu] minta MENTERI PELANCONGAN DAN KEBUDAYAAN menyatakan peruntukan, program atau projek seperti program kebersihan dan membina marina bertaraf antarabangsa untuk memajukan sektor pelancongan di Pantai Timur Sabah terutamanya di Semporna. Ini kerana isu kebersihan dan kemudahan asas sangat penting untuk menarik lebih banyak pelancong ke Sabah.

JAWAPAN : DATO' SERI MOHAMED NAZRI BIN ABDUL AZIZ
MENTERI PELANCONGAN DAN KEBUDAYAAN

Tuan Yang di-Pertua,

Untuk makluman Ahli Yang Berhormat, Kementerian Pelancongan dan Kebudayaan telah memperuntukkan sebanyak RM24.5 juta di bawah *Rolling Plan* Pertama (2016-2017), Rancangan Malaysia Ke-Sebelas (RP 1, RMKe-11), bagi melaksanakan lima (5) projek pembangunan pelancongan di Negeri Sabah.

Manakala, di bawah Rancangan Malaysia KeSepuluh (RMKe-10) tahun 2011 – 2015, Kementerian telah memperuntukan sebanyak RM46.7 juta bagi melaksanakan projek-projek pembangunan pelancongan di Negeri Sabah.

Daripada jumlah tersebut, sebanyak RM800,000 telah diperuntukkan di kawasan Parlimen Semporna bagi melaksanakan Projek Menaiktaraf Kemudahan Pelancong di Taman Marin Tun Sakaran, Semporna (RM300,000.00) dan Projek Peningkatan Kemudahan Infrastruktur Pelancongan Jeti Pelancong di Daerah Semporna (RM500,000.00).

Kementerian ini melalui inisiatif NBOS 1M Voluntourism juga telah melaksanakan program-program kesukarelawan yang melibatkan pembersihan, pemeliharaan dan pemuliharaan produk-produk pelancongan dan kebudayaan di seluruh negeri termasuk negeri Sabah. Pada tahun 2017 sebanyak 41 program 1M Voluntourism telah dilaksanakan yang melibatkan 14,070 sukarelawan. Daripada jumlah

tersebut, empat (4) program telah dilaksanakan di Sabah di mana dua (2) daripada program tersebut adalah aktiviti penanaman terumbu karang dan tukun tiruan di Pulau Bum Bum di Sabah berhampiran Semporna dan Pulau Mari-Mari Sepanggar, Sabah. Kementerian telah bekerjasama dengan Badan Bukan Kerajaan seperti *Sabah Backpackers Association* bagi program penanaman terumbu karang dan tukun tiruan sebagai usaha mengembalikan ekosistem dan keindahan alam marin bagi menjadikan Malaysia sebagai salah satu destinasi utama bagi program penyelaman.

Untuk makluman Ahli Yang Berhormat juga, Kementerian Pelancongan dan Kebudayaan sentiasa bekerjasama dengan Agensi Negeri terutama sekali Kementerian Pelancongan, Kebudayaan dan Alam Sekitar Negeri Sabah (KEPKAS) dalam usaha untuk memajukan sektor pelancongan di Pantai Timur Sabah sekaligus menjadikannya sebagai sebuah destinasi pelancongan terkenal di negeri Sabah.

Sekiranya Ahli Yang Berhormat mempunyai sebarang cadangan pembangunan pelancongan yang bersesuaian di daerah Kota Kinabalu dan Semporna, ia boleh dimajukan ke Kementerian ini melalui Kementerian Pelancongan, Kebudayaan dan Alam Sekitar Negeri Sabah (KEPKAS) untuk dipertimbangkan di bawah *Fourth Rolling Plan, RMKe-11*.

Sekian, terima kasih.